



# LINYON

Piblikasyon Linyon Demokratik Seselwa

Vol. 3

No. 13

Le 29 Novanm, 2018

## BIDZE: LDS I FER SON DEVWAR

### *Nou bloke ler i annan koripsyon ek gaspiyaz*

**E**nn bann latas pli enportan ki Lasanble Nasyonal i annan se sirvey depans gouvènmàn. Ladan eleman prensipal se Bidze.

Responsabilite LDS dan prosesis bidze se pou fer sir ki tou depans gouvènmàn i kler. I fer sir ki larzan i al pour bann depans nesese e ki i byen ganny servi.

I ranpli sa devwar par demann keston afen ki manm Lasanble e osi Seselwa an zeneral, i konpran byen ki sa ki pe ganny propoze.

Sa i fer 3-enm Bidze ki'n pas dan lanmen LDS dan Lasanble. In annan bokou amelyorasyon. Bann zofisye ki ansarz bidze bann minister in vin pli kler dan zot prezantasyon. Zot in fer

### *Oditer Zeneral i dir kont gouvènmàn i pli an ord - sa se aköz travay LDS.*

en pli bon travay pour zistifye larzan ki zot in demande. In napa siny koripsyon ek gaspiyaz. Alor i rezonab ki Lasanble i aprouv Bidze.

Bidze i reprezant larzan ki nesese pour fer travay Gouvènmàn marse. I annan saler bann travayer e larzan pour bann servis ki Gouvènmàn i donnen. An plis ki sa, en gran nonm dimoun dan sekter prive i depan lo Gouvènmàn pour zot biznes. Sa pa vèdir ki LDS pa kapab bloke. Kot i annan koripsyon, frod, gaspiyaz e

lezot labi, LDS pou fer sir ki sa i ganny bloke.

LDS in dir ki i pa pou zwe politik avek travay lo bidze dan Lasanble. I pa pou servi bidze pour avans kampany 'Danny Out' e son demand pour nouvo eleksyon prezidansyel.

Letan napa koripsyon pour devwale, sa i pa fer zistwar me i pli normal. Se koumsa ki i devret ete.

Aprouv bidze i zis komansman. Parey bann Manm LDS in fer kler, se rezilta ki konte. Prezan i reste pou fer sir ki larzan dan bidze i ganny servi parey in ganny propoze. LDS pou kontinye get tre pre ki manyer Gouvènmàn i met son bann program an mars pour anmenn byenet Seselwa.

## Parti Voler Later

### *R 17 milyon lo en morso later leta - Fodre rann kont*

**A**n traver prezantasyon Bidze 2019, nou'n aprann ki parti o-pouvwar in vann sa propriyete kot STC i annan son 'Builder's Depot'. In transfer sa avek STC li-menm pour en sonm R17 milyon.

Zistwar sa propriyete i montre pratik fer trafik avek byen lepep Seselwa. Sa later ti ganny pran par SPUP pou fer en lakonpani konstruksyon, Island Construction Company. Msye Danny Faure li-menm ti en direkter sa konpani. Zot ti telman bon lo fer biznes ki sa konpani ti fayit e fermen.

An 2013, sa later ti ganny transfer



lo non Parti Lepep pour R1. Zot ti apre lwe sa landrwa avek STC pour R800,000 par mwa. Depi ler LDS in vin dan Lasanble Nasyonal an 2016, in annan leokri lo sa size. Bann manm in

fer sa en target dan lapel pou fer desann pri lavi. Zot in eksplike ki sa pri exorbitan i ede gard pri komodite STC tre o, e zot in demande ki Parti Lepep i rann sa later avek leta.

Me olye pran sa sans pour koriz en aksyon malonnet, zot in al pri lwen e vann sa propriyete pour R17 milyon. Sa i pli pir koripsyon.

LDS i kondann sa lavant koman en vol. In montre ki sa parti ki'n o-pouvwar pe kontinyen ek son bann aksyon malonnet e ki zot pa pou arete ziskan ler Seselwa i tir zot.

**Kontinyasyon lo paz 2**

*Sanz non pa pou fer li pli bon si in pouri anndan*

# Parti Voler Later

LDS i osi blanm Prezidan Danny Faure ki'n aprouv sa lavant, akoz sa pa ti kapab ganny fer san son konsantman. Sa tranzaksyon i osi montre ki Parti i ankor pe servi STC pour son prop benefis e ki i konplis dan sa sityasyon lavi ser dan Sesel.

Sa later ti'n devre ganny rann avek leta e apre gouvrenman ti a decide ki pli bon manyer pour servi sa landrwa e si ti devre met li a dispozisyon STC, sa ti kapab ganny fer.

Sa lavant i swiv lezot trik ankor ki Parti in fer avek later ki in pran avek leta oparavan.

Seselwa i bezwen konpran ki vol e koripsyon pa pou arete tan ki nou pa tir sa Parti o pouvwar.

## Sanz non pa fer li pli bon

**Ankor** enn fwa, parti ki o-pouvwar in sanz son non. I fer li katriyenm fwa. SPUP in vin SPPF, in vin Parti Lepep e in vin US. Pa fer okenn diferans.

I kler ki sa parti in sanz son non ankor akoz i dan en lanbanra. I anan en bann zistwar sal ki i pe sey met deryer li : Vyolans, Labi Pouvwar, Koripsyon, Vol Later, etc.... Me se pa non sa parti ki'n fer sa bann keksoz, se dimoun ki ti pe diriz li.

Sanz non pa pou fer li pli bon si in pouri anndan.

Ozordi, bann zofisye sa parti, tel ki zot bann manm dan Lasanble, pe sey koz en langaz ki zot in aprann avek LDS. Me eski zot leker in sanze obyen zot pe zis fer kwar? Fodre nou a war pour kwar.

An tou ka, sa ki nou'n konnen se ki soley in kouse lo sa parti ki ti zwadizan pour lepep me ki'n reste toultan pour bann ki annan pouvwar ek privelez.

## LDSWA: Pour Plis Partisipasyon Madanm Dan Politik

**M**anm Lasosyasyon Madanm LDS sorti partou dan nou bann distrik in rasanble pour zot rankont anyel Dimans le 18 Novanm. Sa rankont dan Sant Konferans Victoria in en moman for pour sa Lasosyasyon ki'n tre aktiv pandan sa lannen.

Rankont anyel i lokazyon pour Lasosyasyon ranpli bann devwar administratif ki enkli prezant rapor travay e rapor finansyel ek zot bann manm. Me i osi donn moman pour diskite bann size ki pou form zot program aktivite.

Enn bann size ki'n ganny bokou lantasyon se partisipasyon madanm dan politik e pour sa, Lasosyasyon in pran rezolisyon pou met zefor dan konbat kont bann lobstak ki madanm i fer fas avek, tel ki viktimizasyon politik. Zot in osi demann Parti LDS pour fer tou posibilite pour angaz plis madanm lo nivo parti, koman kandida pour eleksyon Lasanble e dan en gouvrenman LDS a lavenir.

Lezot size ki'n ganny met devan se lasante bann madanm, ki lasosyasyon



in decide pou met dan zot program aktivite, e osi ranforsi zot lorganizasyon dan rezyon Est Mahe.

Sa rankont anyel ti ganny prezide par Mm. Desheila Bastienne e Onorab Flory Larue ti fer MC. Lider LDS, Roger Mancienne ti osi prezan pour adres bann manm. Apard rasilir zot ki i ti ankor la koman lider parti LDS, i ti eksprim lankourazman e sipor pour zot travay.

Avek sa rankont, Lasosyasyon in met pare pour en kontinyasyon travay. Pour lafen lannen, zot pou annan en bal dan restoran Golden Plate le 7 Desanm e osi en dezennan le 16 Desanm pour bann siporter aze.

**Lasosyasyon Madanm LDS  
ek Lasosyasyon Lazenes LDS  
i envit ou pou zwenn zot dan en  
*Rankont Lafen Lannen*  
Vendredi le 7 Desanm Aswar  
Golden Plate Restaurant**

**Tiket i an vant kot biro LDS e avek reprezentan distrik.**

LDS i remersye tou siporter e piblik pour zot partisipasyon dan rali e lamars  
**DANNY OUT - ELECTIONS NOW !**  
**Lo Mahe, Praslin e La Digue.**  
**LINYON I FER LAFORS**  
**ANSANM NOU POU REISI.**